

Zaštita prava građana BiH

Vijeće Evrope – kao i Evropska konvencija o ljudskim pravima – i dalje igraju veoma važnu ulogu u postavljanju standarda koje Bosna i Hercegovina treba da ispuni, rekao je visoki predstavnik Valentin Inzko danas obraćajući se Komitetu za monitoring Parlamentarne skupštine Vijeća Evrope u Strasbourgu.

Povodom desete godišnjice formalnog prijema Bosne i Hercegovine u članstvo Vijeća Evrope, visoki predstavnik je pozvao evropske parlamentarce da pomognu da se osigura “postojanje adekvatnih kapaciteta”, te da ne dođe do podrivanja rada institucija koje štite prava građana BiH.

“Ljudska prava, demokratija i vladavina zakona su zajednički uslovi koje postavlja Daytonski sporazum, Evropska unija i Vijeće Evrope”, rekao je on.

Visoki predstavnik je opisao slučaj Sejdić-Finci kao “jedinstvenu priliku da Bosna i Hercegovina evoluiru u pozitivnom pravcu koji će rezultirati konkretnim poboljšanjima za građane”.

Iako priznaje da i dalje postoje osporavanja Daytonu i Bosne i Hercegovine, visoki predstavnik je ipak naglasio nedavne pomake na okončanju političkog zastoja koji je doveo do ekonomskih i socijalnih teškoća.

Visoki predstavnik će se danas popodne također sastati sa Thorbjørnom Jaglandom, generalnim sekretarom Vijeća Evrope.